



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tirymyim@aolima



tir yimyim

TAPAK 3

Trivendra Singh Rawat-i
Uttarakhand CM mapa toktsü

AGP tenzüker Prafulla Mahanta-i
assembly election nung metokteptsü



VOL. XVIII NO. 145 (ADOK 145) DIMAPUR

RASEMNÜ (WEDNESDAY)

METSÜREMI (MARCH) 10, 2021 ₹ 5.00

Nisung 12,217 nungi 11,955 taneptsü nguogo

Kohima, March 9 (TYO): Anogo ana atongtepa Mongulbarnüa Nagaland nung nisung shinga dak-a COVID-19 alima meputet.

"Tanü nisung shinga dak-a COVID-19 meputet. Külen Kohima nung nisung ka taneptsü nguogo" ta Health & Family Welfare Minister S Pangnyu Phom-i metetdaksü.

"Nisung 12,217 rongnungi 11,955 taneptsü nguogo. Nagaland nung COVID-19 nungi taneptsü angubaji 97.85% lir" ta Health & Family Welfare Director, Dr Denis Hangsing-ia metetdaksü.

Nagaland nung COVID-19 puteter nisung 91 asüba nungi parnok 10 bo tanga timtem ajanga asü. Külen, nisung 153 tashi tanga state temi ogo, ta paisa ashi.

Tang anepalurtemji Dimapur nung nisung ka aser Kohima nung 17 lir, ta Dr Hangsing-isa shisem.

"Nagaland nung COVID-19 alitsü akok ta temolung melemi bilemba sample 1,32,242 tendangogo. RT-PCR ajanga sample 75,103, TrueNat ajanga sample 37,383 aser Rapid Antigen Test ajanga sample 19,756 tendang" ta paisa metetdaksü.

Centre sorkar mapa inyaker temi July nungi DA angutsü

New Delhi, March 9 (Agencies): July 1, 2021 nungi tenzüker Centre sorkar mapa inyaker temi aser pensioner temi dearness allowance indang tajangzük ajunga angutsü, ta Minister for State for Finance Anurag Thakur-i metetdaksü.

January 1, 2020, July 1, 2020 aser January 1, 2021 anogotem nung DA indang installment asem tashi agütsütsüba liasü saka COVID-19 wara ajanga itemji sota ayu.

July 2021 nungi dearness allowance indang tajangzük ajak agütsütsü ta lemtetba ajanga

Centre sorkar mapa inyaker nisung lakh 50 shi aser pensioner lakh 65 dak tema ajangzüktsü.

Iba osang ya Rajya Sabha nung Minister for State for Finance, Thakur-i tezüluba nung telangzüba agütsü.

Centre küm ka tesadang atema DA revision anena ataba ajanga sorkari Rs 37,530.08 crore kümzüktet aser iba ajanga Covid-19 wara agi rongsenkettsüng tsütsü khuret bentsür aruba aika kokteta inyakogo.

Tang Centre sorkar mapa inyaker temi DA 17% angur.

PM Modi-i India & Bangladesh tsüngda apu lapoktsü

Agartala, March 9 (Agencies): Mongulbarnü Prime Minister Narendra Modi-i video conference ajanga India aser Bangladesh tsüngda Maitri Setu lapoktsüogo.

PM Modi-isa Tripura nung mapatong aika inyaksü atema lung azüngtsü.

Iba sentong nung Tripura Governor Ramesh Bais aser chief minister Biplab Kumar Deb na aden aser Bangladesh Prime Minister Sheikh Hasina-i jembiba video message sayu.

"Tripura hungeri taoba küm 30 tsüngda sorkartem aser tesüiba küm asem indang 'double engine' sorkar indang tebandang ajangshir. Taoba mapang ochimashi aser commission sobaliba melena tanübo tajangzük angutsüpur indang account-i indangindanga yoker" ta PM Modi-i ashi.

"Sorkar mapa inyaker temi mapang shitak nung itasen manguba tanübo 7th pay commission ama itasen angur. Tang mezüng atema Tripura nung MSP lemtetogo aser iba ajanga aluyimertemi khuret majurutsü" ta paisa metetdaksü. Taoba küm 6 nung Centre

sorkari Tripura nung terenlok nüngdakba ajak anepalua inyakogo. 2009-2014 tsüngda Tripura nem central development schemes Rs 3500 crore agütsü, ajisüaka 2014-2019 tsüngda Rs 12000 crore tashi agütsüogo, ta PM Modi-isa ashi.

Iba apu lapokba ya India aser Bangladesh tsüngda tesentaktep akangshiba dang masü saka shishilembaba tesentaktep tajungba yanglur. Northeast India aser Bangladesh tsüngda trade corridor ka asütsü atema tesem ajunga renlok daksür, ta paisa ashi.

"Tang nungi Northeast nungertemi gari lenmang ajanga dang masü saka tanga agi sendakteptsü. Bangladesh nung Chittagong port aser Northeast ayong ajanga sendakteptsü mapa inyakdar" ta Modi-isa metetdaksü.

National Highways and Infrastructure Development Corporation Ltd-i iba apu ya Rs 133 crore endoka yanglu.

Kilometer 1.9 talang apu yagi India nung Sabroom aser Bangladesh nung Ramgarh sendakteper.

Governor RN Ravi-i NHIDCL mapatongtem meyipa reprangshi

Dimapur, March 9 (TYO): Nagaland Governor RN Ravi-i state nung infrastructure tekaratiba nung renloka aotsü tangatetba nung March 9, 2021 nü NHIDCL mapatong atema senden ka menogo.

Vamuzo Memorial Town Hall, Chozuba nung senden amendang Governor RN Ravi-i Kohima-Jessami Road (109.32 KMs), Chakabama-Zunheboto Road (115.53

KMs) aser Pfutsero-Phek Road (62.56 KMs) indang jembiba.

Governor-isa district balala nung Deputy Commissioner tem item mapatong mapang shitak nung tembanga inyaksü atema pei pei district nung tebilemstsü onüktem angatetteptsü metetdaksü.

Ravi-i bangdak contractor tem dang alizüng tonga inyaktettsü atema nübo, oset aser machine tem peria amshia

inyaksü tetuyuba agütsü. Paisa Agencies/Departments dang külemi longjemer inyaksü ayongzük, ta PRO to Governor sangdong ka nung ashi.

NHIDCL-i küm 2-3 tejaklen account nung sen enokjaka department kari zübazülema mapa meinyakba atema süoki ia bilemer. Iba ajanga mapa shitak meinyakteter ta Governor-isa metetdaksü.

BJP Nagaland-i PDA sorkar nem tenüngsang agütsür

Dimapur, March 9 (TYO): Chief Minister Neiphiu Rio aser Deputy Chief Minister Y. Patton na lenisüba kübok People's Democratic Alliance (PDA) sorkar küm asem tashi abensa inyaka aruba atema tenüngsang agütsür ta Bharatiya Janata Party, Nagaland State Unit-i metetdaksüogo.

PDA sorkar nung NDPP, BJP aser Independent MLA ka dennür ketdangsüa arudang tayongzükba jenti ajuruaka nübortem asoshi mapa inyaksüogo, ta BJP Nagaland State Unit President Temjen Imna Along-i sangdong ka nung ashi.

Tesüiba küm asem tsüngda Nagaland-i mapang tamajung aika ajuruogo. 2018 küm tzünglu kanga aruba ajanga teraksa jenti bentsür aru aser COVID-19 wara ajuru. Item mapa tamajung

ajak nung PDA sorkari Common Minimum Programme nung ajemdaker inyakogo. Tanüa sorkar kümdanga lir aser tarutsü anogotem nunga tayongzükbatem atema inyaksü renema lir, ta paisa metetdaksü.

President Chingwang Konyak-i anir NDPP züngsem ajak, Independent MLA Tongpang Ozukum aser BJP Nagaland State Unit nung züngsem ajak dang pelaba metetdaksür ta Temjen Imna-isa ashi.

Küm asem abensaba atema benjungdang Leader of Opposition TR Zeliang-i anir Opposition NPF danga pelaba metetdaksür. Wara agi tonger timtemdang parnoki sorkar den teka amteper inyakogo. Iba wara ajanga politics aser democracy tobur ajungba tali

shisangdaksüogo aser ajak longjemer nübortem asoshi inyakogo, ta paisa ashi.

Naga yimten latettsü atema Arogo, NGOs, CSOs, Kin Hoho temi tanen makai inyaka aruba atema pelaba shisemer. Ano, Prime Minister Narendra Modi lenisüba kübok India sorkar den yimjung olemtep nung adenba Naga yimten telok ajak nem tenüngsang agütsür, ta BJP Nagaland State Unit President-isa metetdaksü.

BJP Nagaland State Unit-i maneni sorkar aser party-i nübortem dang nangzüka aliba ama inyaksü. Nagaland aser idaki aliba nübortem ajangzüktsü atema BJP-i aniba NDA sorkar yimyim "Sabka Saath, Sabka Vikas, Sabka Vishwas" indang tajangzük agütsü onoki ayongzük, ta Imna Along-isa ashi.

CM candidate atema Assam BJP obang meputeper

Guwahati, March 9 (Agencies): Assam nung BJP-i chief ministerial candidate meshimba ajanga Assam BJP sasep nung mepetmesü ka adoka lir.

Assam BJP nung telok kati BJP sorkar kümra Sarbananda Sonowal nem Chief Minister inyakdaksünür.

Külen, Assam BJP telok kati State Minister Himanta Biswa Sarma nem taruba chief minister inyakdaksünür.

Mongulbarnü Assam BJP lennir Pranab Baruah-i osangbener den jembidang iba onük ya temai adok.

BJP-i Himanta Biswa Sarma

ya taruba CM candidate inyaksü ta sayutsüla ta Pranab Baruah-i takhangba agütsü.

"Assam nung BJP indang CM candidate asütsü atema Himanta Biswa Sarma tenüng metetdaksütsü ni akhanger" ta Baruah-i ashi.

Ajisüaka, Assam CM Sarbananda Sonowal aser State Minister Himanta Biswa Sarma naprongi BJP CM candidate shimtsübaji party central leadership dak dang keta lir ta ashir.

"BJP ya national party ka lir. Iba telemtebaji BJP central leadership-i dang agütsü" ta

Mongulbarnü CM Sarbananda Sonowal-i ashi.

Külen, Himanta Biswa Sarma-ia "Asenoki aremzüka atatsüla. Iba telemtebaji BJP indang central leadership-i dang agütsü. Onoki kechi telemtebaji agütsü'ar meshitettsü" ta metetdaksü.

Himanta Biswa Sarma-i Sarbananda Sonowal nungi Assam Chief Minister melenzükttsü akok ta jembibaji DoNER Minister Jitendra Singh-ibo shitak masü ta shiogo.

"Taruba Assam CM ji mapang shitak nung lemtettsü. Tang iba mapangji masü" ta Jitendra Singh-i ashi.

Manipur nung telungpur 20 temai adok

Imphal, March 9 (Agencies): March 9, 2021 nü Manipur Chief Minister N. Biren Singh tsüngdang telungpur telok balala nungi züngsem 20 tashi temai adokogo.

Tanü temai adokertemji Thadou People's Liberation Army (TPLA) züngsem 16, United National Liberation Front (UNLF) nungi 2, People's Liberation Army (PLA) aser People's Revolutionary Party of Kangleipak PREPAK (Pro) nungi kaka lir.

Iba sentong ya State Home Department-i ayongzüka agi aser

Chief Minister Biren Singh-i o jembidang "Prime Minister Narendra Modi-i aniba sorkar akümba sülen nungi Northeast state atema terenlok mapa jenti inyaker" ta ashi.

"Telungpurtemi temai adokba atema tenüngsang agütsür. Nenok nisung shia nem khen atema Rs 4 lakh agütsütsü aser nenoki küm asem rehabilitation camps nung alidang ita shia stipend Rs 6,000 agütsütsü" ta CM Biren-i metetdaksü.

Temai adokba telungpurtemi

skill development training agütsü, ta paisa shisem.

"Manipur state nung Surrender cum Rehabilitation scheme ka tenzüka lir aser iba kübok parnoki tajangzük aika angutsü" ta paisa ashi.

Northeast state tem asoshi Union Ministry of Home Affairs-i Surrender-Cum Rehabilitation scheme tenzükttsüba nung temai adokba telungpur shia nem khen atema Rs 4 lakh aser küm 3 atema itashia stipend Rs 6,000 agütsür.

Dimapur nung police tetsür atema awareness camp agi



Dimapur, Metsüremi/March 09 (TYO): International Women's Day nüngtem nung Dimapur Police ajanga DCP Zone II office nung March 8, 2021 nü police tetsürtem atema health awareness camp ka ayongzüka agia liasü.

Iba sentong nung jembiba mapang, police tem kanga mazüngi aliba mapa nung asünung küm shia temang reprangtsü mapang peria mangur, ta Commissioner of Police, Dimapur, Rothihu Tetseo-i ashi.

Ajisüaka pei temang shidak

as er anema yua dangar asoshi tatishitsü kaka asütsüla, ta pai ashi.

Loktiliba nung tetsürtem ya kanga tongtipang lir ta shia, state assembly nung tetsür kata maliba asoshi Tetseo-i khuret lemsatep aser Naga tsür dang yimtenren nung shilem agitsü ajungshia liasü.

Inner Wheel Club tir, Sanjukta Bhattacharjee-ia iba sentong nung jembiba mapang police tetsürtemi mapa tajung inyakba aser nübur asoshi bendanga agütsüba atema pelaba lemsatepa liasü. Rotary

Club Dimapur, Kitoshi Zhimomi-ia iba sentong nung "Choose to challenge" omen nung akemdaker tayongzüka o tatsüka jembi.

Iba sentong mezüng session nung ACP, Ketoukhrilie Metha menden liasü aser DCP Zone II, Dimapur, Aotula T Imchen ajanga tarur pela agizükba o jembi liasü.

Iba sentong tembangba sülen breast cancer onük nung sensaksem agi aser maneni Dr. Nitin Agarwal o Dr. Khushboo Agarwal nati police tetsürtem temang tendanga liasü.

Directorate of School Education ajanga metetdaksür

Dimapur, Metsüremi/March 09 (TYO): Directorate of School Education ajanga sangdong ka nung ashiba agi, India nung nünjiso ngur küm 75 ajungba "Azadi ka Amrut Mahotsav" ya Independence Day 2021 atongtsü hopta 75 lia tenzüksü aser Independence Day 2023 tashi alitsü.

Iba benjongmung tenzüka ya 12-03-2021 (Dandi March anogo) nungi tenzüka anogo 25 alitsü aser April 5, 2021 (Dandi March tembangba) nü tembangtsü.

Anogo 25 sentong ya Ato Kilonseri Gujarat nungi March 12, 2021 nü tenzüksütsü.

Iba sentong tenzüka den lirumedema Nagaland state kübok aliba school ajak nung March 12, 2021 nü tsünglanglen agüja aliba sentongtem ayongzüka agitsü metetdaksür.

1. 'Events leading to India's independence from British rule

and Role of various freedom fighters in it' onük nung ajemdaker Conference/Seminar/Symposium/Talk/Webinar/kaketshirtemi shilem balala agiba sentong ghonda ka agitsü.

2. 'Analysis of India's struggle for independence - different schools of freedom movement from 1857 to 1947' onük nung ajemdaker Essay Competition mesüra Creative Writing Competition alitsü.

School level nung category shia shilem tajungtiba agiba kaketshir tem District/State level competitions nung shilem agitsü jaoktsü, koba March ita hopta pezübuba nung agitsü. District/State level nung shilem agir nem kulikaket agütsütsü aser entry tajungtiba ya State/School Board websites nung sayutsü.

National level nung NCERT ajanga MyGov den lungjemer Movement of Independence of

India aser India nükla dak sendakba omen nung creative writing sentong March 12, 2021 nü ayongzüksü.

Iba atema link ya <https://ncert.nic.in/> aser MyGov: A Platform for Citizen Engagement towards Good Governance in India nung angutsü. Agüja aliba link nung essay agütsüba kaketshir ajak nem online certificate of participation agütsütsü, kong Director, NCERT aser CEO, MyGov meyonngem alitsü.

MyGov: A Platform for Citizen Engagement towards Good Governance in India ya technology teyari nung nübur aser sorkar tsüngta partnership yanglutsü asoshi sabang ka lir.

School nung tetoktepbatem ya school indang social media nung Twitter-@EduMinOfIndia / Facebook-EduMinOfIndia / Instagram-eduminofindia tag sür lemsateptsü akok.



Diphupar 'B' Ao Baptist Arogo International Women's Day 8th March 2021 Onük-"Lenisüba nung Tetsü" ta asüba nung ajemdaker Dr.Longerla Longkümer Principal Messenger Bible College Chumukidema. La ajanga tetsür ka aser tetsü ka taküm tanela rangpen kümzüka ayutsü aser ochi tamang nung kibong aser lokti ajak tanela nung meraketa anitsü Tsüngrem O ajanga lemsatepba liasu, Tsüngremi la wadang maneni moajangma aser shilem agir ajak dang kanga pelar.



Office of the
AO SENDEN LITERATURE BOARD (ASLB)
MOKOKCHUNG - 798 601, NAGALAND
Reg. No.HOME / SRC-6703

Ref. No. ASLB/Gen/S-05/2020-2021

Date: 09-03-21

ASLB SANGDONG

Yangi ASLB nüngdak kar tatsü agi sangdonger;

1. ASLB-i achaayanga agiba Arangtet Tatidang 2021 Tanabubaren atema Shiyim (form) Metsüremi 15, 2021 anogo nungi Rongchii 20, 2021 tsüngda Dimapur, (Mr. P. Alem Jamir, 7005501457), Kohima (Mr. Aotemjen Jamir, 8794043063) aser Mokokchung ASLB office tesemtem nung angutsü.
2. Class 9 aser 10 atema Ao tazüngtsü kaket Metsüremi 12, 2021 anogo nungi talitsü angutsü.
3. Aser tanüngba class-tem kodang tongdir kasa osang kaket nung sangdong agütsütsü.

(Dr. L. Temjen Jamir)
Chairman, ASLB

(I. Temjen Tzüdir)
Secretary, ASLB



Aoyimkum Baptist Arogo Women Ministry-i International Women's Day tenüng nung S. Alemla Jamir aser L. Kika Pongener na jala, Apenla Pongen-i Aoyimkum tetsür rongnungi mezüng NPSC tatidang nung takok angula Junior Technical Assistant (2019-2020) jenjang anguba asoshi tenüngsang aser tetushi agüja liasü.

NHIDCL ajanga kaketshir 3,816 nem mamatzü agütsütsü

Kohima, Metsüremi/March 09 (TYO): Corporate Social Responsibility (CSR) inyakyim nung shilem ka ama tanü National Highway & Infrastructure Development Corporation Ltd. (NHIDCL) ajanga National Dairy Development Board (NDDB) foundation for nutrition den lungjemer Nagaland nung aliba Government school ti atema 'giftmilk' agütsür.

Dimapur District Cooperative Milk Producers' Union Ltd (DIMUL) ajanga iba sentong ya Indoor Stadium D Khel Kohima village nung tenzüka liasü.

Kohima aser Dimapur nung aliba government school shia nungi kaketshir ajak agi 3,816 nem anogo 20 atema 'Giftmilk' ya agütsütsü, ta DIMUL Chief Executive Officer, Dr Mhasizokho Lhoushe-i ashi.

Kohima nung item school temji New Market, PWD aser Chandmari nung aliba Government High School tem aser Government Middle School, D Khel Kohima villages. Maneni Dimapur nunga Government Middle school - Chumukedima, Dimapur Town & Kuda aser Government Primary school, Lengrijan nungtem alitsü.

Iba sentong nung Special Secretary, Department of School Education (DoSE) Kevileno Angami ajanga Gift Milk sponsor asür NHIDCL aser NDDB nem tenüngsang agütsü.

Naga nungeri mamatzü agi yangluba chiyongtsütem masü saka carbohydrates product tem chia-ajemtsü yimya süba, anungji iba inyakyim yagi kaketshirtem

diet aser nutrition kasa agütsütsü imlar, ta lai ashi.

Tanurtem school-i arunüa puatsü asoshi Midday Meal (MDM) agütsüba nungya mamatzü adentsüla asü, kechiaser iba ya ajanga immune system tashi taitba kumdaksütsü. Temu aketba chiyongtsü achiba dang nungibo temang asoshi tajangzüka anguba chiyongtsütem achi tajungba, ta laisa ashi.

NDDB indang Senior Manager Dr M Jayakrishna-ia iba sentong nung white revolution in India indang jembi, koba Verghese Kurien-i tenzüka aser iba yongji India nung mamatzü peria adoker aser bendang linük nunga bener oa ayoker, ta ashi.

Pai ashiba agi, Northeast nung aliba nüburtemi anogo nung amatzü marok tesadang ka shi ang ajemer saka India nung tanüngba tesemtem nung alirtemi marok ana shi ajemer, ta survey ajanga sayur.

Mamatzü teti ajemba ajanga immune system tashi itshidaksüba den külemi tanur ka tekolok renloker, aser class nung metitemi adenba kaketshir nem anogo 20 atema anogoshi mamatzü 180ml agütsütsü, ta pai ashi.

NDDB ajanga iba project ya tentanga district ana nung tenzüker aser takok ngura, maneni danga district tem nunga inyaksü, ta Dr Jayakrishna-isa ashi.

Iba sentong nung Principal Director, School Education, Shanavas C aser NHIDCL General Manager, Regional Office Kohima, M Khan nungtertemia jembi liasü.



March 9, 2021 nü Manipur Chief Minister N. Biren Singh tsüngdang telungpur telok balala nungi züngsem 20 tashi temai adokdang agiba noksa angur. Tanü temai adokertemji Thadou People's Liberation Army (TPLA) nungi nisung 16, United National Liberation Front (UNLF) nungi 2, People's Liberation Army (PLA) aser People's Revolutionary Party of Kangleipak PREPAK (Pro) nungi kaka lir. Parnoki AK-56 rifle ka, M-15 rifle ka, MK-33 rifle ka, Uzi SMG ka, Lathod gun ka, Glock 19 pistol ka, 9 mm pistols trok, .32 pistols ana, .22 pistol ka aser injang tapu balala 75 bener temai adok. (Imphal, March 9)

AGP tenzüker Prafulla Mahanta-i assembly election nung metokteptsü

Guwahati, March 9 (Agencies): Assam nung taoba mapang kümsük anaben tashi chief minister inyaker Prafulla Kumar Mahanta-i taküm election nung metokteptsü.

Barhampur MLA Mahanta-i Asom Gana Parishad (Pragatisheel) party asentenshitsü meranger ta jembiba mapang ka nung iba osang ya metetdaksüogo.

Mahanta ya 1985 nungi khien danga methitemi MLA inyaka arur. Ajisüaka, pa kinungtsü-i

taküm Assembly election nung pa metokteptsü ta asüba osang metetdaksü.

Prafulla Mahanta-i takok angutsü teimla kanga ajema lir ta asüba agi pa nem ticket magütsü ta Assam Gana Parishad (AGP) president Atul Bora-i ashi.

"BJP nem Barhampur menden agütsüba nung tasa atongba kecha mali. Iba menden nung takok angutsü ta bilemer. NDA-i menden ka nung takok angutsü asü masü'ar asenoki repranga atadi" ta Atul Bora-isa

ashi.

Ajisüaka, Mahanta-i Citizenship Amendment Act anema maneni noktakba ajanga par party-i pa masener ama bilemer.

Mahanta-i All Assam Students' Union (AASU) president inyakogo aser pai CAA anema noktakba agi AGP-i pa senzüka yutsü.

Assam nung küm 6 tashi bendangertem anema lungkak aityonga arur 1985 nung Assam Accord sign asü aser iba sülen Mahanta-i AGP tenteta liasü.

Union Minister-i Manipur nung 'Regional Agri Fair 2020-21' lapoktsü

Imphal, March 9 (Agencies): Hombarnü Union Minister of Agriculture and Farmers' Welfare Narendra Singh Tomar-i Manipur nung Central Agricultural University (CAU)-Regional Agri Fair 2020-21 lapoktsüogo.

Narendra Singh Tomar-i video conferencing ajanga Lamphelpat nung iba sentong lapoktsü.

Regional Agri Fair ya

Northeast nung aluyimertem atema tajangzüik asütsü aser iba ajanga parnoki timba tsünütetsü aser farming technology tasentem angaziütsü, ta pai ashi.

"Centre-i Pradhan Mantri Fasal Bima Yojana, PM Kisan Samman Nidhi Yojana aser Soil Health Card scheme tem tenzüka aluyimertem ajangzükdaktsütsü meranger" ta Tomar-isa ashi.

Union Minister Tomar-isa

model fish farm, school building, dispensary, food processing unit aser tanga infrastructure dak sendakba maparentem lapoktsü.

"Regional Agri Fair ajanga Northeastern Region nung aluyimertem tsüngda sensaksem, tesentaktep aser shisatsü lemsateptetsü. Tarutsü nunga iba ama sentong nung temolung agütsütsüla" ta Manipur Chief Minister N. Biren Singh-ia metetdaksü.

Himanta Sarma tepsettsü tasa atongba atema ULFA lennir Pradip Gogoi apu

Guwahati, March 9 (Agencies): Guwahati nung police-i olemtep nung adenba ULFA lennir Pradip Gogoi puogo.

Temaba ketdangpurtemi tetuyuba agütsüba sülen Dispur Police Station nungi ketdangsürtemi Pradip Gogoi apu.

Ajisüaka, police-i pa apuba atema osang memetetdaksü lir.

Osang kar ajanga ashiba agi, Assam Minister Himanta Biswa Sarma tepsettsü atema

tasa atongba atema police-i ULFA lennir Pradip Gogoi apu.

Police-i Pradip Gogoi indang phone records bendenogo aser iba nung pai Karbi Anglong nung nisung ka o Sarma tepsettsü atema jembitepba lir ta osang angazüker.

Ajisüaka, Pradip Gogoi-i ibaji magizüker.

"Police-i kü dang kecha mashi. Parnoki ni aonung ozü kidang nungi anizüker ao" ta ULFA lennir Pradip Gogoi-i ashi.

Assam CM Sonowal-i Majuli constituency nung nomination süogo

Jorhat, March 9 (Agencies): Mongulbarnü Assam Chief Minister Sarbananda Sonowal-i Majuli constituency nungi tokteptsü atema tenüng agütsüogo.

Sonowal ya Majuli constituency nungi BJP MLA teinyakdak lir. Tanü pai Deputy Commissioner indang office nung Returning Officer tsüngdang nomination papers agütsü.

Iba mapang BJP züngsem noklang aikati pa meiner ao. BJP lennirtem DoNER Minister Jitendra Singh, BJP Assam in-charge Bijayant Panda, Assam

Minister Himanta Biswa Sarma aser Assam State BJP president Ranjit Dass nungertema liasü.

CM Sonowal indang roadshow nungsa BJP den yaritepba teloktem- AGP aser UPPL nungi lennirtemia shilem agi.

March 27, 2021 nü Assam Assembly election mezüngbuba shilem nung Majuli nunga polling asütsü.

Sarbananda Sonowal-i election affidavit agütsüba nung pa indang rongsen Rs 3.17 crore shi alang lir ta shia lir. Iba ya 2016 aser 2021 tsüngda Rs 1.32 crore timba akümba lir.



March 8, 2021 nü Union Minister of Agriculture and Farmers' Welfare Narendra Singh Tomar-i video conferencing ajanga Manipur nung Central Agricultural University (CAU)-Regional Agri Fair 2020-21 lapoktsüba angur.

TTAADC election atema Tripura BJP sasep nung mepetmesü adoka lir

Agartala, March 9 (Agencies): Tripura Tribal Areas Autonomous District Council (TTAADC) election nung BJP-i IPFT den medemer ama tokteptsü lemtetba atema BJP sasep nung mepetmesü ka adokogo.

BJP indang central leadership-i Chief Minister Biplab Deb dang IPFT den "friendly contests" asütsü tetuyuba agütsüogo saka Tripura BJP nung lisopur lennirtemi iba ya magizüker.

"Central BJP lennirtemi menden kar nung IPFT den medemer ama tokteptsü tuyuogo ta onok dang ashi. Ajisüaka, onoki menden 28 prong nung candidate toktepdaktsünür" ta BJP MP Rebati Tripura-i ashi.

Hombar aonung tesü Chief Minister Biplab Deb'er kidang Tripura nung BJP lennirtem

senden ka amen aser idangji TTAADC election atema onüktem jembi.

Iba senden nung Tripura kübok lisopur tesemtem nungi BJP MLA tem aser BJP Janajati Morcha lennirtem aden.

TTAADC election atema IPFT-i Pradyot Deb Barman-i aniba TIPRA den tesentaktep yanglua liasü. Ajisüaka, hopta ishika lir külen IPFT-i TIPRA toktsür ano BJP den tesentaktep yanglu.

Anogo ishika tejaklen IPFT-i TTAADC election atema candidate 18 shimba osang metetdaksüogo aser ano candidate talila shimtsü ta shiogo.

Ajisüaka, BJP-ibo IPFT-i parnok den masüngdangtepi TTAADC election atema candidate shimogo ta tai tongloktsür.

GOVERNMENT OF NAGALAND DIRECTORATE OF INDUSTRIES & COMMERCE

PRE-JOB PLACEMENT

Skill Training at Nagaland Tool Room & Training Centre

SN	Job Roles/Course Name	Age	Course Duration	Qualification	Tentative Start Date
1	CNC Lathe Machine cum Computer Graphic Design	Between 15 to 35 Years	6 months	10 th Pass	2 nd Week of March 2021

Features:

- Government Sponsored Training Course.
- Free Food & Lodging, Uniform, Welcome Kit, One-to-One (1:1) Tablets for Class Room Learning and One Time Travel Cost.
- 100% Job placement assistance & Post Placement Support on successfully completing the course.
- Vacancy/Quotas limited for the districts of Dimapur, Kiphire, Mon, Zunheboto, Longleng, Peren, Tuensang & Phek.
- Admission started on first come first basis.
- Application Last Date: 15/03/2021 (4:00 pm)

For Further Assistance, Contact: 7005042823/8258977353/ 7005876150 (M)

Sd/- Shri. K. Hokeche Assumi, Director
Industries & Commerce Deptt

• Website: www.nttcdimapur.org.in • Email-ID nttcdimapur@gmail.com
New Industrial Estate, Sub-Jail Junction (Tinali), NH-36 Diphu Road, Dimapur: Nagaland



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 10, 2021

ASENOK YA OCHISHIR ASÜ ?

Tanü putu nung asenoki asenok ochishia aliba aser maliba indang kanga jembir, ajisüaka asenok rongnunga shibabo ochishia alir aser shibabo malir metettsü kanga tasak. Aji oda, asenok nisung shia ya ochishia alir asü maliar tendangtsü atema tendangtetsüsa oset ka yangluteta aka asübo, asen temang nung azü tüzüka tendangba ama tetendangnüsüka, saka nisung dak aketba shisatsü intang asü meitang tendangtsü osetbo yangluteta maka asünungji, asenok ochishir asü masüar metetsüabajibo anogo shia asen kija mesüra loktiliba nung alidang asenoki koma jembir aser koma benschir, item jakla yimya jagi asenoksasa asenoka tendangtetsü aser tangaria metettsü. Asenok tia ajung, asenok jakla aser mulungsentsü tendangtsü asoshi tesayur kari asenok nem tasadangba yimya kar agüja lir, anungji, tanübo asenoki asenoksasa asenok ya ochishir asü masüar tendangdi. Asenok ya Khristan asünungji, asenoki aaba nungi noklang nung tershilem agütsütsüla, ajisüaka asenok nungdak meperiba agi tershilem shitak magütsüra, nai tanga maparen nunga ochishia melitettsü. Nai senotsü kanga apayua amshir, aji junger, saka senotsü kümzüksü asoshi nai nür kidang atsükba light-ji meter box majangi tsüka lira, mesüra bill aika madoktsü atema meter box perepsar amshia lira, na yimten nung tashi (power) amshir ka aküm nungbo, nai na takar akümtsü atema tim masüba lenmangtem nungi rongsen sashia bendentsü. Na telok nung chiyongdang, nü sen agütsütsü masü angati chiyonger ta bilema nai mechimatsüsa chiyongtsü enokra, kenü anogo nü nem nübortem asoshi teyari alemtsü mapa ka nungloktsü nungbo, naibo tesadang ka miima agizüka yur tesadangka dang lemtsütsü. Nai yimkong meyong metsümeshidak metsümeshidang, mashimashi janaa yutsüra, nü dangi nübortem asoshi inyaksütsüsa tashi arunungbo, naibo iba sen jagi nür kidang yanglutsü. Nai nür kilong merükba dak alaka nür kima aser kilentsü merüka ayutsü mebilemra, na yimsüsür aküm nungbo nai na asoshi dang bilemtsü aser government meyong rongsen nür meyong akümtsü. Nai nür kimabo kanga merüka ayur saka janaona ajak kidanger kimaleni yoker ta inyakra, na yimten nung ketdangser ka asünungbo terenlok mapa inyaksüba sen ajak nai dang rezünga ayutsü. Na nungdak aodang, nisung aika tarensena nokdaka lir aser tamapur tama asütsüla saka nai tashiyim agi nisung ajak alemteta orr na tama mapa atemtsü merangra, naibo takoktsü dang süra yimkong meyong shilem ajak rakzüka ayutsü. Lenmang tila aser gari onsara, anungji nungtepa yur moutet gari ajak pei pei mapang nung meilongi aotsü tarensena, horn-a magütsüi, tanemi atatepa alidang, nabo horn tulu tanen maka agüja gari ajak ajateta aotsü merangra, na yimten nung telemtetba menden nung amentsü maongka angu nungbo, naibo shinga mezüngshii na ajungtsü asoshi dang aritepa inyaksü aser manger sangwa nung takar kümer alitsü. Na gari nung aodang chiyongtsü chia tzü jema aor aser nür kima masüji nai na achiba chiyongtsü alepba teküp, plastik, kaket aser tzü bottle tazüng ajak yimti yimdong nung endokyonga ora, na tulus aküm nungbo nai sensaker aser timtemer indang mebilemi na dang jangratema chiajema alitsü bilemtsü. Nabo ita nung sen aika angur saka sensaker asoshi yokba jangotsü agitsü atema ration card yanglua lir aser tanurtema sensaker chirnurtem agiba scholarship agia züngdaksür ta süra mapang dang angu nungbo naibo tuluka auyatsü. Na tasoba küm aser anogo ana, shitakba asoba anogo ka aser certificate nung meteta aser memeteti enokba anogo ka, saka nai na tajangzük angutsü atema na asobo küm aser anogo shitakbaji masü saka taibajiang shitak kümer agira, nai inyaktetsüsa nü dangi yimten tashi aru nungbo, naibo mapa meinyak ser tiyazü bill aser taila nisungtem tenüng nung sen taruba ajak agizüka agitsü. Tang tashi nungji asenok taküma ochishia alir asü maliar terabo asadangtetter asütsü imlar.

OLEMSABANG

KÜ MANGDANG KIBUBAI DANG METET

- K. Imliyanger Jamir

Küm jenti kotak temsüba lenmang nung -
Timtemseta jajaaka ni melular,
Iba lenmang piyong kü nela tesünep nung jajar,
Kotak lenmang temesüba nung -
Khrista den taküm tasen;
Saka kü mapang kibubai dang metet.
Kibubai ponguben tashi kü taküm -
Tasütsü nungi kümzükbä;
Kü taküm kuli aser tenüngsang nüktsü pai metet,
Pa senti zü agi ni menen nungi -
Nüchikümdaktsü nungji;
Kotak lenmang temesüba nung -
Ni tanü tashi jajadagi, haliluya -
Künü ni pa tejak angutsü;
Kibuba kulisüba mapa nung alidang asü?
Mesüra asa tao mapang nung-ar;
Kü mapang kibubai dang metet.
Timtem aika ajanga temeshiba lenmang -
Nung jajadang;
Anogoshi tepela nüktsü ayimer,
Iba tepelaji tebang agi ashitsü -
Makokba tepela tulu,
Shibai ajangshi pai tali shitettsü,
Iba lenmang nung jajadang;
Mulung zürep tia ajurudang;
Pai ni süngzükdaktsü;
Iba lenmang nung timtem jenti

liaka;
Anosa jajaner,
Aji ni masü,
Kü dak aliba tanelai ajungshir,
Saka kü mapang kibubai dang metet.
Kotak lenmang temesüba nung jajadang;
Taküm tazüokba nung Manguba lima ka angutsü teimla nung jajar,
Temesüba lenmang nung küm jenti jajaaka,
Anosa jajaner,
Kechiyong iba lenmang nung kü kija mejajar,
Shibai kü dang tekümtet sayur -
Pa kü den jajar,
Saka kü mapang anasaba anasabai arudagi
Kü mapang kibubai dang metet.
Temesüba lenmang piyong;
Onsara dang kumdanga ajemalua jajar,
Iba lenmangji tesünep lenmang;
Iba lenmang nungji timtem jenti lir,
Ibai tasen Yirusalem atongtsüba lenmang;
Ibai Zion lenmang;
Iba lenmang nung ni küm jenti -
Jaja-aka melular,
Anosa jajaner;
Saka kü mapang kibubai dang metet.

NBCC & ABAM CLEAN ELECTION INYAKA ARUBA NUNG TAKOK ASER TAMAKOK

~ Rev. Ayutemjen, Pastor, Dibuia

(Yashi adok nungi...)

Political Party aser Candidate:

Tongti o jembiri onük jembir külen onük dak sendakba nung osemlok aser olemtep mapang jembidang, taoba election nung Khristan yimsü (tanga minority religion ajak) anema inyaker party asen limai nungoka aiddaktsüba asen Naga Khristanem talisa Aor tamakok tulutiba. Ya BJP telok anemer masü, saka BJP agenda koba agi tangar tamangba yimsü aser sobaliba anemer, itemji anema Khristanemi tasü itta nokdaktsü.

Tanabuba nung "ni nübortem shimtjetang" ta tangatetba nung masü saka "ni adoktsüla" ta iba tangatetba nung Electioni aier. Anungji pa/la adoktsü asoshi ochimashi mapa inyaka sen talubosa amshia meyongnem alir. Yamaji mesüi, tangatetba tajung nung candidate shiai sen aser tashiyim agi masü, mapa tajung aser pei nübör aser pei lima meimba tanela tajung agi Electioni aitsüla. Tasembuba nung, asen lima jungdaktsünera political party shinga nema küm pungu tema yimsü mesüdaktsütsüla ta asen nübortem nem angatetdaktsütsüla. Ano retired/voluntary retirement agir Electioni aiba ya yimya tamajung, retired is retired ta tangatetba alitsüla. Parnok government mapa nung alidang ochimashi bendenba sen agi meyongnem aliba yagi alima raksar. Tanü lanur aika tashi temetetba den nübör meimer lir, parnok nem alimaji anidaktsütsüla. Yamaji asü nung dang asen lima aintsü.

Arogo ayak kuliji ochi nung nokdakba aser ochi inyakba ya lir. Ochi o tasü ita mejembitetra aser meinyakra, arogo nungdak maka akümer. Arogo ya alima nung ochi kuli asütsü Tsüngremi jatet. Anungji yimden nung ochimashi mapa, lokti teraksa, rongsen ketsüng maparen balala nung ochi mashi anema tartsüba aser temetongshiba agütsütsüba aser arogo kuli aser tenyaba mapa. Meyongnem agütsütsüba nüsüng shia temeten lir aser iba temetenji shingai rakzüksü makok. Saka iba temetenji tashiyim agi rakzüka aruogo aser karibo yoka chiogo. Iba mapa dang lokti temenen ta ajar aser itemji anema raratsü arogo nem nungloktsü. Arogo aser Laishiri iba ochimashi mapa anema tasü ita noktaktsü. Talisa, political party shirnoki tamangba anema, minority telok anema inyaker, asa-lendong yanglur iba party anema tai ta tasü ita noktaktsü. Ano government shiba nübör terenlok asoshi masü, saka pei ajungtsü asoshi ochimashi mapa inyaker iba party anema nokdaktsü. Anungji taruba ita nung Clean Election koma tajungba inyaka aotsü iba indang jembitsü ta tanabuba YSS Sensaksem osang lemsateper. Ano sensaksemba mapang, ABAM lokti teraksa yanglushiba nung tashi taitba bener aotsü asoshi tang ABAM Social Concern Committee ta aliba ya "ABAM Social & Political Concern Committee" ta amshi nunga tajungba asütsü ta lemsatep. Tsüngremi asen lima aser nübortem ochiba asoshi moajangma kechiaser asen Kibuba Khristai ashi, "Aser nenoki ochiji metettsü aser ochi jagi nenok nüchi kumdaktsütsü." Yohan 8:32

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agatsü mepishir

Covid ozüing alema inyaker pastor ka May tashi jail nung ayutsü



Pastor James Coates

March 09, 2021: Canada nung aliba Arogo ka nung pastor kati coronavirus wara anema tenokdangba alema inyakba atema taoba ita police-i pa pua liasü; May ita tetenzüklen nungi iba ken o angadangtsü aser iba mapangji matong tashi pa jail nung ayutsü atema court kati obendang agütsüogo.

Edmonton Court of Queen's Bench Justice, Peter Michalyshyn-i, GraceLife Arogo nung Pastor James Coates ji ken o mangadang tashi jail nung ayutsü; May 3 nungi May 5 tashi Stony Plain nung aliba Alberta Provincial Court nung iba ken o angadangtsü, ta metetdaksü.

Pastor Coates ya February 16, 2021 nü apuba sülen Edmonton Remand Centre

nung puoka lir; pa nem bail agütsütsü, ajisüaka pai GraceLife Arogo Tenla kidangi maotsüla, mesüra pai tekülem sentong magitsüla ta nangzüksü pa dang tuyua liasü; ajisüaka pai ibaji nangzüksü memelung.

Pastor Coates aser GraceLife Arogo atema ken o jembitsür- Justice Centre for Constitutional Freedoms (JCCF) nungi okatsürtemi, bail nung chiochtsü atema telatetbatemji ozüing alema lir, ta shia liasü. Ajisüaka judge-i, taoba ita pastor chiochtsü atema telatetba kar tuyuba nungji legal tsütsü aibelen kecha mali, ta ashi.

Iba ken o angadang metenzükdang yongisa pastor chiochtsü atema JCCF-i Alberta

Court of Queen's Bench nem temepishiba ka agütsütsü tebilemba lir.

JCCF Tir, John Carpay-i sangdong ka ajanga, "Ken o angadangtsü atema hopta 8 lateta ayuba, aser iba mapang tashiji tai maket pastor ka jail nung ayutsü lemtetbaji mapang kanga talang. Pastor Coates ya tesüngjem Khristan minister ka lir. Pai kodanga pa tangatetba anema meinyaktsü," ta metetdaksü.

Carpay-isa, Pastor apuba ya Coates indang Charter rights & freedoms anema lir, ta ashi.

Osang angzazükba agi, pastor jail nung liaka GraceLife Arogo nung züngsemtem maneni Tenla kidang adenshia tekülem sentong agia arudar.

Osangbener den jembidang pastor indang lawyer, James Kitchen-i, pastor ya ozüing kübok tashi angaa aliba nisung ka lir, ajisüaka ozüing aser Laishiba teratet na tsüngda meputetba ajanga iba timtem adok, ta metetdaksü.

Tamalen Pastor Coates-i affidavit ka ajanga, wara anema tenokdangba benoka tekülem sentong magitsü tuyubaji local Arogo ka tashi aser Kibuba Yisu Khrista indang tematiba tashi anema lir, ta metetdakja liasü.

ANOGO ABEN TSÜNGREM DEN

Temsüa Jajaang

..., koba ajaba agi nenok ajak, iba ajaba temsüa jajatsü, Ni, Kibuba nung tepuokbai nenok dang mepishir. Efesa 4:1-3

Pauli Efesa 1-3 nung Khristan tesayuba aser Khrista nung tamanger ka jenjang indang jembí. Tang iba tapu nung tamanger mapa aser yimya lemsateptsü indang jembir. Pai pasasa Khrista nung tepuoker ka ta jembí aser tesem kar Tsüngrem aser Khrista asoshi talenba kilir taaka amshir. Pai tamang katetta aser tashi angaa Yisu sülen anidaktsüba tasak ta metetdaksünü saka parnok tajaba temsüa jajatsü Pai ayongzük. Tamanger tekümtet dangi ajaba nung Tsüngremi taochi talubusa sayu (Yn. 15:16), parnok tetemsü ta masü, saka tamangertemi temsüa jajaba agi Pai aochiba sayutsüla.

Pauli asenoki anogo shia jajatsüba meraji tanü asenok dang sayur. Yisu jajaba ama jajaba, Yisui bilemba ama bilemba aser Yisui jembiba ama jembiba ajanga asenoki temsüa jajaba sayur. Kibubai asenok dak kongshia tasüngdangba ka asüngdang aser ibaji asenok ajaki langzütsüla. "Kechiba nenoki Kü dang Kibuba, Kibuba ta ajar, aser Ni ashiba meinyaker?" (Lk. 6:46). Asenoki kechi inyaktsüla Pai shia lir.

Nai Kibuba ne Tsüngrem meimang, aser ne kiyonger meimang. Pai asenok tali tayongzükba agütsür: "Kü dang Kibuba, Kibuba ta ajar shiai kotak yimli-i aitsü masü, saka shibai kotak nung aliba Kü Bui mulungba ama inyakdir pa aitsü" (Matt. 7:21). Asenoki tejembidang mejembí, tejajaa jajatsüla; temsüa jajatsüla.

Tsüngrem, tanü Nai kü o tem aser mapatem anüktsü ni Ne dang mepishir.

Celebrate Recovery Ministry tenzüksang, John Baker süogo

March 09, 2021: Celebrate Recovery Ministry yaritepa tenzüksang, pastor John Baker alima nungi pilaogo; Rick Warren-i aniba Saddleback Arogoi temesepba mozü achirtem yaritsü nükjidong nung iba ministry ya tenzüka liasü.

Mongolbarnü Celebrate Recovery National team-i social media ajanga John Baker asüba osang sangdonga liasü.

Celebrate Recovery National Director, Mac Owen aser pa kinüngtsü, Mary nati, "Taküm nung khenkhenbo asenoki ajangshiba o agi abensaa melemsatepteter, item anogotem rongnung tanep-a densema lir. Kü tembar aser adianu kidangi ogo. Celebrate Recovery yaritepa tentetsang, John Baker tanep yakta alima nungi pilaogo. Ni meteta aliba nisungtem rongnung Yisu Khrista taochi ajanga nisung timtiba aneptsüsangji John liasü, aser pa ajanga taneptsü angurtem rongnung ni-a densema lir," ta metetdaksü.

Celebrate Recovery National team-i maneni pa asüba osang tejangja lemsateptsü, ta shia Khristantem dang Baker kinüngtsü aser Celebrate Recovery co-founder, Cheryl Baker atema sarasademjang, ta mepishia metetdaksü.

"Asenoki John kanga menungratsü, ajisüaka ibaji mapang tatsüka atema dang asütsü, kechiyong kobi melii asenoki pa ajurutsü," ta kasa sangdong nung shia lir.

Khrista tiyongtsü südaktsür tenzükba Celebrate Recovery ya temesepba mozü achirtem mozü nungi pilatsü atema step 12 aliba recovery ministry ka lir. Iba



2016 küm Lake Forest, California nung aliba Saddleback Arogo nung West Coast Celebrate Recovery Summit alidang pastor, Rick Warren (abelen) aser tangartemi John Baker aser Cheryl Baker (mena alir ana) na atema sarasademtsüba noksa nung angur.

ministry ya 1991 küm Lake Forest, California nung aliba Saddleback Church nung tenzüka liasü.

John Baker-i Rick Warren den Tsüngremi pa nem agütsüba mangdang lemsatepba sülen Recovery Ministry ya tenzük.

Tanübo alima tesem balala nung Celebrate Recovery telok 35,000 shi lir, aser iba ministry indang program ya Arogotem, Rehabilitation centres, Rescue Missions, Universities aser jail tem nunga agir.

John Baker-i temesepba mozü achiba aser iba yimya nungi pilaba indang kaket aika zülua liasü; pai mapang ajak nung pa-a temesepba yi jema aliba yimya toktsütetba taküm kuli

lemsatepogo.

Yi ajemba den külemi kibong nung balalulaba pai ajangshi saka Yisu Khrista aser Rick Warren ministry ajanga pai nüchiba angu.

John Baker-i social media ajanga pa taküm kuli aiben lemsatepogo, aser mapang ka nungbo pai yamai lemsatep, "Asenok ajak dak kasa yimya aika lir. Asenoki Khrista meimer, asenoki Pa nem asen taküm bendanga agütsütsü melunger, aser kibongtem nung mepetmesü bentettsü atema asenoki sarasademter."

Facebook nung Saddleback Church lenir, Kay Warren-i, "Tanü alima nung tongtibang nisung ka makai kümogo aser ozü kibong atema-a tembar tajung

ka aser Khrista nung adianu tajung ka makai kümogo," ta lemsatep.

Laisa, küm 30 tejaklen John Baker-i pa taküm teraksa Yisu Khrista nem bendanga agütsü, aser Tsüngremi pa taküm melenshija pai sayatenya inyak, ta ashi.

"Alima tesem balala nung tetsür aser tebur million 7 dak temai teimla nguogo, aser taküm tasen tenzükogo. Pa (Baker) den pa kinüngtsü, Cheryl aser Rick Warren nungeri senteper Celebrate Recovery tenzük. Ni John kanga meimer aser kanga sempet tajung aliba nisung tajung ka ya kanga menungratsü," ta lai ashi.

Celebrate Recovery

International Director, Richard Cobb-i, John Baker ya tamangdir ka lir; taküm teraksa süaka Tsüngremi asenok yaritsü, ta pai nisung aika ajungmesoa liasü, ta ashi.

National evangelical prison ministry organization Prison Fellowship Tir, James Ackerman-i, "Küm aika tejaklen California nung ni John pa indang office nung ajurua liasü. Küna jangratema sensak sema liasü aser maparen aika longjemer inyaka aruogo. Tsüngremi mapang tetemsü nung asenok ajurutepdaktsür. Prison Fellowship Academy nung Celebrate Recovery Inside ya tongti shilem ka kümogo," ta metetdaksü.

Social media nunga nisung meyirjang aikati John Baker indang program ajanga parnok taküm nung temelenshi tulu aliba lemsatepogo.

Social media nung nisung kati, "Kü taküm nung temelenshi adokdaktsüba atema nü dang pelar, John Baker. Tsüngrem yimli sentsüwangshi atema nai alima tesem balala nung nisung aika taküm nung kongshiogo. Ner kibong, medemertem aser Khrista nung kibong züngsem ajak asoshi sarasademtsür," ta lemsatep.

Ano nisung katia, "Iba nisungba yagi ni densema alima nung tejashi nung alir nisung jenti atema mapa jenti inyaktsüogo. Pa asüba osang angashia ni kanga aoksar, ajisüaka tanü pai tematiba Chuba tsüngdang nokdaker sempet agizükdar, ta ni metet. Pai Khrista tashi angaa Celebrate Recovery yaritepa tenzükba atema ni pa dang pelar," ta lemsatep.

OLONG PAITEP # 5748

1		2			3		4			5
					6		7			
8										
							9			
11										12
					13			14		
15										
16							17			

TIPILEN

1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 5747 TELANGZÜBA


TIPILEN :

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüksü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

Agüja aliba noksa nung meputepi aliba bushiang



TANÜBO NAI LANGZÜANG

Q. Axis Bank-i ____ nü WhatsApp Banking lapok.

A. March 3, 2021 B. March 4, 2021 C. March 5, 2021 D. March 3, 2020

===== (Taruba adok nung onoki langzütsü)

YASHI ADOK TELANGZÜBA : Nagpur

AO OSHI ANGAZÜKDAK:

TANÜ ANGAZÜKTSÜBA OJANG

Anep

(v) tanük (Softness)

* Ojalai o kanga anepa jembir.

Anüp

(v) shirang ajungba (heal)

* Ni shiranga aliba anüp.



Tir Yimym

NAI-A YA METETTER MA?

- 1535** - Bishop Tomás de Berlanga-i Galapagos Islands ngutet.
- 1624** - Spain anema raratsü asoshi England-i sangdong.
- 1938** - 10th Academy Awards: "The Life of Emile Zola" atema Spencer Tracy aser Luise Rainer nati takok angu.
- 1939** - Hyderabad kübok rür (hailstones) agi yimtsüng 17 raksatsü.
- 1960** - 17th Golden Globes: "Ben-Hur" atema Anthony Franciosa aser Elizabeth Taylor nati takok angu.
- 1964** - New York City kübok Columbia Studios nung Simon aser Garfunkel nati "The Sound of Silence" indang mezüng version record asü.
- 1975** - Osaka aser Fukuoka tsüngda Sanyo Shinkansen lapok.
- 1988** - Swiss Ski resort Klosters nung avalanche lendong nungi Prince Charles jenbo.
- 2010** - Laureus World Sports Awards: Usain Bolt aser Serena Williams nati takok angu.
- 2013** - 'Burmese National League for Democracy' indang lennir ama Aung San Suu Kyi tanaben shimok.

SUDOKU # 5789

4	6	7		2	3			9	3	6	8	4	9	2	5	1	7
					7	8			5	9	7	1	8	3	6	2	4
		3						7	4	4	2	1	6	5	7	3	8
						3			1	7	5	2	6	8	4	9	3
	7	8	4	3					9	3	2	7	4	5	1	6	8
1	3					7	9		8	4	6	3	1	9	2	7	5
7	2			8	9			5	6	8	9	5	3	1	7	4	2
			1	4	2				2	5	4	8	7	6	9	3	1
8		5	2	6				3	7	1	3	9	2	4	8	5	6

TELANGZÜBA # 5788

OJANG LUTEP # 5335

- SANTEGRA :
- NNGISUI :
- YAKINBA :
- UDANANGG :
- GIIBAJA :
- NGMETOLANG :
- NGNISU :
- NGNGSÜMAA :
- KSAADOK :
- AAM :

OJANG LUTEP TELANGZÜBA # 5334

TEMOATSÜ JUNGA MAGITETI SÜITEMER TANABEN
MERANGDANG SAKA MEZÜNG AMABO MAGITET

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzük nunga koma süla?

Olong 20 shi nung March 12, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.

Trivendra Singh Rawat-i Uttarakhand CM mapa toktsü



New Delhi, Metsüremi/March 9 (Agencies): Bharatiya Janata Party (BJP) lenir Trivendra Singh Rawat-i Mongolbarnü Uttarakhand chief minister mapa toktsüogo. Uttarakhand nung election agitsü küm ka lia pai CM mapa toktsüogo. Rawat shiba 2017 küm BJP-i election akokba sülen CM aküm, pai Angh Baby Rani Maurya den ajurutebpa sülen mapa toktsü.

Mapa nungi anenba sülen osangbenertem den sensaksemba mapang Rawat-

i, BJP party-i tangar ka nem taruba Uttarakhand CM asütsü asoshi maongka agütsütsüla ta angateta telemtetba agi, ta ashi.

"State küm pezü tashi tenzüksü atema party-i kü nem maongka agütsüba ya maongka ulura. Ni amala yimtsüng tila ka nungi adokba nisung ka nem iba maongka agütsüba atema party dang kanga pelar," ta pai ashi. Paisa, legislative party senden ka Bodhbarnü 10:00 ako nungi tenzüka amentsü aser iba mapang pa melener sangdongtsü, ta ashi.

Uttarakhand atema BJP central observers, Raman Singh and Dushyant Kumar Gautam Bodhbarnü senden nung adentsü atema Mongolbar aonung Dehradun tonga aotsü.

Osang ajanga ashiba agi, party-i deputy chief minister ka shimtsü asoshi asadangdar aser iba mapa atema state education minister Dhan Singh Rawat, aser Lok Sabha MPs Ajay Bhatt aser Anil Baluni nunger rongnung ka shimtsü akok. Union education minister Ramesh Pokhriyal Nishank ya taoba maoang CM liasü.

Uttarakhand BJP MLA kari pa yimsüsüba ashishiba mapang Hombarnü Rawat-i Delhi nung BJP lenirtem den ajurutep. Pa state yimtiba Dehradun-i Mongolbar anepdang meyipa ao aser pa pusemertemi pa Jolly Grant Airport nung agizüka liasü. Linük yimtiba nung Trivendra-i, party tekolakba JP Nadda, Union home minister Amit Shah aser general secretary BL Santhosh nunger den ajurutepa liasü.

2017 küm assembly election nung BJP-i menden 69 nungi 57 koka sorkar kümtet. Kasa mapang nung Congress-i menden 11 akok.

J-K nung kiralongrar inyakyim tajemba kümogo: Reddy

New Delhi, Metsüremi/March 9 (Agencies): Centre-i Mongolbarnü ashiba agi, 2019 küm August ita Article 370 aginba sülen Jammu and Kashmir nung kiralongrar dak sendakba azütokshi tajemba kümogo aser iba Union Territory nung 2019 küm den medemdangra 2020 küm kiranglongrar dak sendakba tatalokbatem tejemba kümogo.

Union Minister of State for Home G Kishan Reddy-i, Lok Sabha nung ashiba agi, 2020 küm Jammu and Kashmir nung kiralongrara dak sendakba tatalokba 244 ataloka liasü

koba 2019 küm 594 liasü aser kiralongrar 221 tepsetogo koba 2019 küm 157 liasü.

2021 küm February ita tashi nung kiralongrar dak sendakba nung tatalokba 15 ajangshiogo aser kiralongrar ti tepsetogo, ta pai tezüluba nung telangzükba ka agütsü. Minister-i ashiba agi, 2020 küm Jammu and Kashmir nung security personnel 33 aser civilian trok tepset aser 2019 küm security personnel 27 aser civilian pongu tepseta liasü.

"Article 370 aginba sülen Jammu and Kashmir nung kiralongrar dak sendakba

tatalokbatem kanga ajema kümogo," ta pai ashi. Reddy-i, Centre sorkari kiralongrar khenyongi magizüker aser iba inyakyim nokdangtsü atema security apparatus akangshiba, linük anema nokdakba tashi anema ozüng tesashi benokba, kiralongrartemi tetsükdaktsü adokdaktsüba azüoktsü atema miita aoba sentong tali takhangba benoka inyakba amala jenjang tapet agidar, ta ashi.

Security forces temi kiralongrartem nem teyari agütsütsü merangertem kanga kümdanga meita atadar, ta paisa shisem.



Ato kilonser Narendra Modi-i New Delhi nung Srimad Bhagavadgita scholar 21-i züluba commentaries den manuscript volume 11 sayatsüogo. Jammu and Kashmir Lt Gov Manoj Sinha aser Congress lenir Karan Singh nata noksa nung angur.

COVID-19: Nashik aser Thane nung tenokdangba agütsü

Mumbai, Metsüremi/March 9 (Agencies): Covid-19 tashidak menar tali akümba ajanga Nashik district administration-i, Mongolbarnü nungi tenzüka tenokdangba balala agütsüba den weekend lockdown ka benokogo. Hombarnü nisung 675 dak tashidak poteta tashidak menar 1,26,570 ajungba sülen iba tenokdangba agütsü.

Chief Minister Uddhav Thackeray-i tensa asadangba sülen tenokdangba agütsüogo ta district administration-i ashiba den March 15 nü sülen kiyimba benjung agitsü memelatsü, ta ashi. Temelaba agütsür alirtem March 15 tashi nung kiyimba benjung ayongzüka agitettsü, ajisüaka iba sülen temelaba magütsütsü.

Essential services dak alia tanga dokan aser establishment tem ajak aonung 7:00 ako nungi anepdang 7:00 ako tashi shibangtsü. Restaurant tem aonung 9:00 ako tashi nungbo shibangtsü. Ajisüaka home delivery-bo aonung 11 ako tashi melatsü. Nasik city, Malegaon aser tashidak kanga kara prokshia aoba yimtsüng kar nung School, college, coaching class tem ajak shibanga atatsü.

Permit room tem shilem 50 inyaksangshitsü aser aonung 9 ako nungbo shibangtsü. Tekülemdak ajak anepdang 7

nungi aonung 7 tashi lapoktsü melatsü aser hopta tatemi shibanga atatsü. UPSC aser MPSC amala tatidang koba taoba mapang renemer lir, item tatidangtembo agitsü.

Nashik nung Hombarnü nisung 675 dak covid-19 tashidak poteta tashidak menar 1,26,570 ajung. Nisung trok tashidak agi süogo aser nisung 389 anepogo.

District nung tang tashi nung nisung 2,140 süogo aser nisung 1,20,204 anepogo.

Hombarnü sample 2,182 tendangba sülen Nashik nung sample 5,61,783 tendangogo.

Kasa mapang nung Thane Municipal Corporation-i, tashidak kanga kara menatepa aoba tesemtem Mongolbarnü nungi tenzüka March 31 tashi shibangtsü telemtetba agiogo. Tang tashi nung Thane kübok tashidak agi menentsür aliba tesem 16 jangjaa lir. Item tesemtem dak alia tanga tesemtem nungbo sorkari tetuyuba agütsür aliba ama inyaksangshidaktsütsü.

Maharashtra nung anogo ana tsüngda nisung 11,000 dak tashidak potetba sülen Hombarnübo nisung 8,744 dak dang tashidak potet.

Maharashtra nung tang tashi nung nisung 22,19,727 dak tashidak potetogo aser nisung 52,478 süogo.

UPkübok Lalitpur nung Airport, medical college yanglutsü: Yogi

Lucknow, Metsüremi/March 9 (Agencies): Uttar Pradesh chief minister Yogi Adityanath-i Mongolbarnü Uttar Pradesh kübok Lalitpur tesem nung airport ka yanglutsü sentong aliba sangdongogo.

"Lalitpur nung airport ka yanglutsü. Tang iba tesem nung nai semdangnüba tesem mapang tatsüka tsüngda nung semdangtettsü," ta Adityanath-i ashi.

Paisa, district nung yakta medical college ka yanglutsü ta ashi. Mongolbarnü Lalitpur nung 'Bandai Dam' amenokba sentong nung chief minister-i o

jembiba mapang iba osang lemsatepa laisü. Pa tang anogo ana atema state kübok Bundelkhand tesem semdangba mapang ka lir aser iba mapang pai Jalaun kübok Ladpur nung expressway yanglua aliba asadangtsü.

Yogi Adityanath-isa, Lalitpur ya tang aliba lenmangtem den sendakteptsütsü nangzük, ajita asünungdang linük yimtiba-i aotsü asoshi mapang tajemba agitsü. Paisa, state sorkari iba tesem nung aliba nüburtem nem kisütsü atema teyari, power connections aser iba den health insurances agütsütsü, ta ashi.

Mamata-i Nandigram nung Suvendu aitsü

New Delhi, Metsüremi/March 9 (Agencies): West Bengal chief minister Mamata Banerjee-i Mongolbarnü Nandigram nung nüboyimba sentong tenzükogo, kong la BJP lenir Suvendu Adhikari den tokteptsü.

"Nai ni nomination file mesüdaktsünüra masütsü, saka nai ni ner jala ama bilemra ni nomination file asütsü," ta Mamata-i la indang nomination paper file asütsü anogo ka lia Nandigram nung booth-level TMC workers rally ka nung ashi.

Mamata, shiba Suvendu Adhikari den tokteptsü ali, la taoba mapang külem tenzüker aija, "Gujarat nungi arurtembo lisopur aser nibo bendanger," ta ashi.

Mamata-i la Nandigram

nungi tokteptsü ta sangdongba anogo Adhikari-i pa Nandigram nung lisopur aser chief minister ya bendanger ta ashi.

"Nisung kari ni Nandigram nung bendanger ta ajaba angazükogo. Ni süngmanger. Ni kidanger district Birbhum nung soa intet aser kü dang bendanger ajasang ya-a iba tesem nung asoba masü. Tanü ni bendanger kümogo aser Gujarat nung arurtem Bengal nung lisopur kümogo," ta lai ashi.

State nung aliba nüburtem dang temepeshiba ka agüja Mamata-i, "ni Nandigram kodanga mamatsü, iba tesem ya kü tenük ama lir," ta ashi.

Maneni Banerjee-i ashiba agi, la Singur mesera Nandigram nungi tokteptsü atema mulungteter liasü.

Myanmar nung sepaitem matsüngdang jenshia longkak ait



Mitkartemi sorkar atsüngdokba anema longkak aiterteri Mandalay, Myanmar nung jung yanglua amer nokdaka aliba noksa nung angur. Hombar aonung 8:00 ako nungi tenzüka iba yimti nung curfew benokaka tesem ka nung kaketsir 200 shi taolen makai sepaitemi lungbaner aliba busema nüburtem yimtongi adoka longkak aita liasü.

Yangon, Metsüremi/March 09 (Agencies): Myanmar nung yimti tulutiba, Yangon nung aonung tepiyong longkak aiter lanur noklang aika taolen melie sepaitemi lungbanga yur yokba sülen Mongulbarnü mitkar anema tesem kar nung longkak aiterteri sepaitemi apu.

Myanmar nung mitkar yimsüsürtem dang lanurtem kidangi aotsü melang ta anüolen linüktem aser United Nations ajanga shia liasü.

Mitkartemi election ajanga shimtetba Aung San Suu Kyi aser lar sorkar February 1 nü pua atsüngdokba mechi iba Southeast Asia linük ya

marakzütetü lir. Linük tesem ajungalen anogoshi longkak aiter aser sepaitemi tashiyim amshia longkak aiterteri pua merenshir.

Tang tashinung longkak aiter nisung 60 dak tema takum samaogo aser ano nisung 1,800 dak tema puogo, ta lokti tentet balalai ashir.

Mongulbarnü Yangon aser danga jila kar nung longkak aita liasü, saka sepaitemi tear gas aser stun grenades amshia arishi. Iba mapang nisung ana yiru, aser Mohnyin jila nung nisung kabo injang agi yirua liasü, ta osang ajanga ashir.

Mitkari sorkar atsüngdokba anema Sanchaung district nung

anogoshi lanurtemi longkak aita busema Yangon nunga aonung curfew benoka liaka Hombarnü longkak aita liasü.

Police temi Hombarnü prangbong aser stun grenade tem khashishia danga district nungi nisung kar danga arua ali mali ta ki ajunga sema jajatsü aser nisung kar danga atsükoka aliba putetra merenshitsu, ta sangdong.

Dangar nisung 15 nungi 20 tsünga den ki ka nung atsükoka liasü saka tangbo kidangi meyipa otetogo, ta lanur activist Shar Ya Mone-i ashi.

"Gari nung angati anir senzura liasü aser longkak aiter pelashishia agizükba nisungtema lir," ta Shar Ya Mone-i telephone ajanga ashir.

Nisung kati yimsü asüba tatem kati maru tashi longkak aittsü, ta laisa ashir.

Sepaitem meyipa aoba sülen anepdang 5:00 ako meta kidangi ao, ta longkak aiter kati social media nung ashir.

U.N. Secretary-General Antonio Guterres-i Myanmar mitkar dang taziükba alitsü aser longkak aiter ajunga azüdokshi mesüra mepui chioktsü ashi, aser kasaji Myanmar nung aliba US aser British embassy temia ashir.

Sanchaung nung police temi ki mita aoba mapang nisung 50 shi puogo aser ano maneni mita bushir, ta temeden asoshi nokdakba telok kati ashir.

Russia-i Google, Facebook, Twitter anema ken o benok

Moscow, Metsüremi/March 9 (Agencies): Tanurtem dang ozünga alema longkak aita sentong nung shilem agitsü atema mepeshiba post tem maginba ajanga Russia nung ketdangsertemi social media platform pongu anema ken o benokogo, ta Moscow court-i ashiba Interfax news agency-i Mongolbarnü sangdonga liasü.

Twitter, Google, Facebook anema ken o asemsem benokogo aser abelen shia roubles million 4 tashi senchi achitsü temsüa lir. Kasa mapang nung Tiktok aser

Telegram anema-a ken o benokogo, ta kasa sangdong ajanga metetdaksü.

Taoba ita tir Vladimir Putin anemsang Alexei Navalny tepuokdak ayuba sülen linük ajunga nung longkaka aita ajangshiogo aser iba dak ajemdaker ken o benok. Navalny aser pa pusemertemi ashiba agi, pa ita 30 tepuokdak ayutsü atema obendang agütsüba ya yimden yimsüsüba dak sendaka lir, koba ketdangsertemi magizüker.

Interfax sangdong dak sendakba nung Google-i kcheha

telangzüba magütsü aser Facebook, Twitter, Tiktok aser Telegram-ia iba ken o dak sendakba nung parnok tebilemba lemsateptsü atema mepeshiba magizük.

Google, Facebook aser Twitter anem ken o benoka aliba ya April 2 nü angadangsü, ta agency-i ashir.

Alexei Navalny apuba sülen Russia nung kumtem tsünga mezüngbuba mepetmesü tulu adoka liasü. Linük kübok tesem balala nung nüburtemi sorkar telemtetba anema longkak ait aser kasa mapang nung sorkari lenir aika pua liasü.



Kuwait City, Metsüremi/March 9 : Capital Governorate, Kuwait nung curfew benokba sülen lenmang tazünga aliba noksa nung ang8ur. Kuwait nung Hombarnü nisung tasen 1,326 dak COVID-19 puteta tang iba linük nung coronavirus agi meneper ajak sensteper nisung 201,898 jungogo. Kuwait nung COVID-19 tashidak prokshia aoba azüoktsü mechi March 7 nü nungi tenzüka April 8 tashi nikongdang 5:00 ako nungi anepdang 5:00 ako tashi curfew alitsü sangdongogo.

MULUNGNEN O



ASO:
12.03.1947

ASÜ:
06.03.2021

"Ni rara tajungji raraogo, ni alizünga tonga asüмого, ni tamangji yuogo." - 2nd TIMOTI 4:7

Onoki teti meima aliba Ojala/Otsüla. Asür - **N. Arentsüngla Changki**, la Tsüngrem metetba, taremsük, ajemalu, ochishir, tangutsünü aser tetemjen tetsü ka, onoki meyimlai aliba mapang ka, ajungbena la iba akümüli wadang tembanger, onok mulung züreb tia aser mangyim jashi nung alidang, tentet balala, kiyongertem, kinungertem, sensosanger, anükapang, medemertem aser kija, kibong shisnokisa shisatsu, nubo, rongsen aser sarasadem agi nungita yariogo, nenok ajak den onoki pelaba lemsateper.

Nenok, kija shia tenünga teta ozui pelar ta meshitetba atema sasa-a bilemer, saka Tsüngremi nenok mapa tajung moajang ta onoki sarasademtsür.

- Temeim Chirnur, anükapang, kinungertem aser semchirtem.

PELABA LEMSATEPER

Ozüi teti meima alila ojala **Katemla**, shirangba mapang nungi lai ayongba sentong tashi nung ana aser talang nungi shirnokisa bendanga agüja tamang sarasadem den nübu aser rongsen agi tenlaogo, nenok ajak dangi tsüngtong arua majuruteptetaka Kotaker Tebu Tsüngremi nenok moajang ta iba ocet ajanga nenok ajak dang kangasa pelaba lemsateper.



- Temeim Jala, Jabaso, Semchir & Kinungertem

MULUNGNEN O



Lt. Mr. Rongsenlemba
11/10/1982 - 28/02/2021

Onoki teti meima aliba asür **Rongsenlemba**, pa taküm alidang aser tasünü tashi kwinakati mapa tajung agi onok nungita yariogo, nenok ajak dang kinungertemi pelaba metetdaksür.

Onoki Arogo balala, yimtsünga balala nungi nübu tajungtem, Telok tentet balala, medemertem, kiyongertem aser onok atema aria bilemetsürtem dang temulung taroktiba nungi pelaba metetdaksür. Onok pelaba ya o agi dangbo mabensatsüteter.

Temeim, Kinungtsü, Chirnurtemhirmurtem aser Kinungertem.

US tatong tir Harris kinungbu tesayur inyaksü

Washington, Metsüremi/March 09 (Agencies): United States Vice President Kamala Harris kinungbu Doug Emhoff ya Georgetown University nung law sayutsü.

Tang US nung tashidak wara aser mozü agütsüba, sen trillion \$1.9 relief package aser yimtenren tsütsü telemsa ajanga January 6 nü US Capitol nung rongrong adokba otsü lir.

Koma aor, komaser ni kaketsirtem den jembitettsü aser parnoki komaka kü nem telangzüba agütsütsü ta asüba indang ni jembar, ta Emhoff-i

Hombarnü osangbener dang ashir. "Aser ajiang, teburtem rongnung tanabuba par tesayur lir. Saka atsüanem makai inyaker."

Emhoff-i ashiba agi, pa kinungtsüi class nung kechi inyakar aji metetnür, kechiaser la ya okatsür ka lir. Washington, D.C., indang Mayor Muriel Bowser densema Emhoff-i Hombarnü Hook Hall semdang, koba yangji aliba hospitality nung inyaker nem care kits aser chiyongtsü lema agütsüba COVID-19 relief ka lir.

(Maneni tapak 10 nung...)

SÜR KÜM KA AJUNGER

Tsüba küm: 10/03/2020



Temeim Oba,

Na onok den maliküm ka abensar. Ne tesüngjem jakla, shisatsü aser mapa tajungtem bilemtet dang onok mulungjang ayanger. Tanü na iba lima nung meliaka Ojalai anir onok ajaki nüktzü neta na bilemteter.

- *Temeim Kinungtsü, Jala, Jabasotem, Semchiraser & Kinungertem.*



Dimapur, Metsüremi/March 09, 2021: Goa kübok Trip Morjim tesem nung ayongba Trippin North East Music Fest sentong nung, Nagaland tenüng nungi Alobo Naga & The Band-i shilem agiogo. Anogo ana tashi ANTB den Northeast state balala nungi band tenet agi iba sentong nung shilem agia liasü. Trippin North East Music Fest nung ghonda ka dak tema Alobo Naga & The Band-i parnok indang ken den cover ken ishika tenogo. ANTB-i ano Manipur nung shilem agitsü terenemba lir.

OFFICE OF THE MOKOKCHUNG TOWN LANUR TELONGJEM

HQ: MOKOKCHUNG - 798601
MOTTO: ALWAYS VIGILANT

COVID-19 relief fund atema senotsü teyari agütsüba asoshi MTLT COVID-19 Co-ordination Committee ajanga na aser ner kibong dang pelaba lemsateper:

Sl. No	Name and address	Amount (INR)
1.	Apong and sisters, Alongmen Ward	5000
2.	Mr. Gurav, Delhi	25,000
3.	Mr&Mrs. Moayanger Pongen, NDPP Youth President Kumlong Ward	2000
4.	Miss. Asenla Aier, Delhi	1000
5.	Mr. & Mrs. Sangyumongba, Yimyu Ward	2000
6.	Mr. Imkongmeren, Artang Ward	2000
7.	Mr. Purkumzuk Longkumer, Artang Ward	500
8.	Mr. & Mrs. Lipok Imsong, Dilong Ward	5000
9.	Sungthy Imchen, Korea	2000
10.	Takuangla Jamir, Hyderabad	3000
11.	Mr. Bendang Chingmir	6000
12.	Temsuchila	3000
13.	Chubatila, Dimapur	2000
14.	Oshy Longkumer, Aongza Ward	2000
15.	Mrs. Thangi Mannen	20,000
16.	Eastern Pharmacy, Mokokchung	10,000
17.	Mr. Gulzar, Bihar	5000
18.	Mr. Ajato Longchar, Yimyu	1000
19.	Shri. Metsubo Jamir, Minister, Rural Development, Nagaland	3,50,000
20.	Mr. Moa Atsongchanger, Mokokchung	500
21.	Mr. Chenton Konyak, Medical Colony, Dimapur	500
22.	Mrs. & Mr. M. Bendangnukshi Longkumer, Arkong Ward	10,000
23.	Mrs. & Mr. B. Temsuinba, Da nang, Vietnam	2000
24.	Mrs. & Mr. B. Merangken Longkumer, Yimyu Ward	20,000
25.	Nagaland Mineral and Mines	1,00,000
26.	Imtiyala	1000
27.	Anonymous	500
28.	Imnatula, Arkong Ward	500
29.	Mr. & Mrs. Ramok, Lomisa, Yimyu Ward	500
30.	Mr. & Moasunep, Yimyu Ward	1000
31.	Dr. Imtiwati, Sangtemla Ward	3000
32.	Arenla Pongen, Mongsenbai Ward	500
33.	Mrs. & Mr. Lendilong Longchari	2000
34.	Er. Yanger, PHED, Mokokchung	50,000
35.	Mr. Manik, Dehradun, UP	2000
36.	Mr. Mrs. Chubalenden, Lijaba Lijen Ward	1000
37.	Mr. Yapangetmjén, Longchem	500
38.	Watisenla Jamir	1000
39.	Mr. Chirang Pongen, Aliba, Kichutip Ward	2000
40.	Mr. Imtiakum, Salangtem Ward	3000
41.	Mr. Amjad, Blue Hill Travels, Mokokchung	15,000
42.	Young Enterprising Society (YES), Mokokchung	10,000
43.	Anonymous	2000
44.	Shri. Sharingain Longkumer, Speaker, Nagaland Legislative Assembly	30,000
45.	Imlibenla Wati, Aongza Ward, Mokokchung	5000
46.	Aren & Atu Longchar, Kumlong Ward	3000
47.	Mr. & Mrs. Temsuchuba Jamir, EAC Mokokchung	10,000
48.	Mr. & Mrs. Kawoto Choppy, Penli Ward	2000
49.	Tajungrenba, Kohima	500
50.	Shri. Tongpang Ozukum, Minister, Housing & Mechanical	20,000
51.	NPF Legislators, Mokokchung	50,000
52.	MCCI	1,00,000
53.	M/s Jemti Ao	30,000
54.	Odinenba Jamir, Unger, Yisemyong	2000
55.	NDPP Mokokchung Region	10,000
56.	Supong Agency	10,000
57.	Lipokmeren Jamir	10,000
58.	Imtiyanger, Aongza Ward	5000
59.	Mr. Lima Jamir, CAO, Ao Region	10,000
60.	Anen Aier, Sangtemla Ward	5000
61.	Anonymous	20,000
62.	Imliyanger Jamir, Sangtemla Ward	2000
63.	Mokokchung District T20 Cricket Federation	1000
64.	S. Jongtosang Aier, District Pharmacy Officer	5000
65.	Mr. & Mrs. Limatoshi, Dilong Ward	20,000
66.	Shri. Toshipokba Longkumer, NDPP Vice-president, Nagaland	10,000
67.	Mr. Watitoshi, Alongmen Ward	5000

Sd/-
(B. MERANGKEN LONGKUMER)
Convener
MTLT COVID-19 Coordination Committee

68.	Mr. Longjaba, Alongmen Ward	10,000
69.	Mr. & Mrs. Imoonen Jamir	5000
70.	Mr. & Mrs. L. Peter Longchar	2000
71.	Dr. & Mrs. Bendangchuchang Longchar, Aizwal	5000
72.	Mr. & Mrs. L. Imtisanen Longchar	2000
73.	Ms. I. Makenla Changkier	5000
74.	Mr. & Mrs. Kazubokba Jamir, B.D.O	5000
75.	Mr. & Mrs. Imkongmar (Chungtia)	10,000
76.	Mokokchung Town Lanur Telongjem	1,00,000
Total :		Rs. 11,84,500

(Rupees Eleven Lakhs Eighty-four Thousand Five Hundred only)

Osettsüset agi yariba atema Committee ajanga item dang pelaba lemsateper:

- Mr. Sumak Longkumer, Merepkong Ward
- Mr. Moasunep Longchar, Yimyu Ward
- Mr. Imnaonen Pongener, Artang Ward
- Late. Mr. O. Temsu and family, Penli Ward
- Mrs. Tutu Jamir, Arkong Ward
- Mrs. Lipokienla Imchen, Yimyu Ward
- Ms. Ajung Mollier, Dilong Ward
- Mrs. Longjemnaro, Salangtem Ward
- Ms. B. Noktila, Longkumer Kilum
- Ms. Sashirenla Lemtur, Tongdentsuyong Ward
- Mr. Takotong Longkumer, Ungma
- Mr. Sennunger Imsong, Dimapur
- Mr. Edenba, Proprietor - The Restaurant
- Mr. Limayanger Changkier, Tongdentsuyong Ward
- Dr. Takosunep, IMDH
- Dr. Tiameren, IMDH
- Mr. Imti Imsong, Mongsenbai Ward
- Ms. Atola Pongen, Kohima
- Ms. Anenla Jamir, AIR Kohima
- Mr. Benjongkumba
- Mr. & Mrs. Yangertemjen, 20th Mile, tuli Town
- Vision Media Centre, Mokokchung
- Eastern Medical, Mokokchung
- Eastern Pharma, Mokokchung
- Bio-Drug, Mokokchung
- GRAFIXPRINT, Salangtem Ward
- Mokokchung District Administration
- Police Department, Mokokchung
- Medical Department, Mokokchung
- Trail Hounds Cycling Club Mokokchung
- The Treehouse faculty
- All eighteen ward councils of Mokokchung town

Item dang alakteta pelar:

- Shri. Metsubo Jamir, Minister for RD and Mokokchung district COVID-19 in charge
- Dr. Longri Ao, Advisor for Treasuries &accounts, National Highways and Mokokchung district COVID-19 in-charge
- Shri. Imkong L. Imchen, MLA and Mokokchung district COVID-19 in-charge
- Shri. Sharingain Longkumer, Speaker, Nagaland Legislative Assembly
- Shri. Temjen Imna Along Longkumer, Minister for HE and Tribal Affairs
- Shri. Tongpang Ozukum, Minister for PWD (Housing and Mechanical)
- Shri. Limawapang, Deputy Commissioner Mokokchung
- Shri. Vishal IPS, Superintendent of Police, Mokokchung
- Dr. Chubala Aier, Chief Medical Officer, Mokokchung
- Shri. Chubawati Longchar, President, Ao Senden
- Smt. Maonginla, President, Watsu Mungdang
- Shri. Nungtokyanger, President, Ao Kaketshir Mungdang
- Shri. R. Ayim Longkumer, President, All Ward Union Mokokchung
- Shri. Moa Longkumer, President, Mokokchung Town Aoer Telongjem
- Shri. Imkummeren Jamir, President, Mokokchung Town Lanur Telongjem
- Shri. Pangertoshi, General Secretary, Dimapur Ao Youth Organisation
- Rev. Dr. Mar Atsongchanger, Executive Secretary, ABAM
- Rev. Ponen Longchar, Pastor, MTBA
- Smt. Shilula Imchen, Associate Pastor (Women), MTBA
- Doordarshan Kendra Kohima (DDK)
- All India Radio, Mokokchung
- All the print media houses in Nagaland
- Local cable TV operators in Mokokchung, Kohima and Dimapur

Mokokchung nüburtem asoshi nenoki yaritepba aser iba tashidak wara agi sünger lia nenoki yariba ya onok molung nung teti alitsü. Tsüngremi nenok ajala moajang. Kanga pelar.

Sd/-
(LONGRANGTY LONGCHAR)
Member Secretary
MTLT COVID-19 Coordination Committee

Critics Choice Awards 2021:

'Nomadland'-i award timbaangu

Mumbai, Metsüremi/March 09, 2021 (Agencies): Deobarnü (07.02.2021) Los Angeles yimti nung terepranger medeni 26buba Critics Choice Awards sentong agiogo. Golden Globes aser Emmy Awards ama, iba sentong atema nominee tem tesem balala nungi online/virtual ajanga shilem agi; kasa mapang Los Angeles nung Taye Diggs (host) den tanga presenter temi sentong ketdangsüa liasü. Mank aser Minari film ajanga nomination timba - 12 aser 10 angu. Ano külen, TV series nung, Ozark aser The Crown ajanga nomination terokrok ngua liasü.

Ajisüaka, Critics Choice Awards sentong nung US road movie 'Nomadland' ajanga award timba ang, kong Chloe Zhao-i best picture aser best director award agizük.

*** Critics Choice Awards 2021 nung takok angurtem yamai alitsü:**

- Best Supporting Actor: Daniel Kaluuya, 'Judas and the Black Messiah'
- Best Supporting Actress: Maria Bakalova, 'Borat Subsequent Moviefilm'
- Best Young Actor or Actress: Alan S. Kim, 'Minari'
- Best Acting Ensemble: 'The Trial of the Chicago 7'
- Best Song: 'One Night in Miami'- 'Speak Now'
- Best Director: Chloé Zhao, 'Nomadland'
- Best Cinematography: 'Nomadland'- Joshua James Richards
- Best Film Editing: 'Sound of Metal'- Mikkel E.G. Nielsen & 'The Trial of the Chicago 7' - Alan Baumgarten TIE
- Best Visual Effects: 'Tenet'
- Best Hair and Makeup: 'Ma Rainey's Black Bottom'
- Best Costume Design: 'Ma Rainey's Black Bottom' - Ann Roth
- Best Production Design: 'Mank'- Donald Graham Burt (production designer), Jan Pascale (set designer)
- Best Actor: Chadwick Boseman, 'Ma Rainey's Black Bottom'
- Best Original Screenplay: 'Promising Young Woman'
- Best Adapted Screenplay: 'Nomadland'
- Best Foreign Language Film: 'Minari'
- Best Original Score: 'Soul'- Jon Batiste, Trent Reznor, Atticus Ross
- Best Actress: Carey Mulligan, 'Promising Young Woman'
- Best Picture: 'Nomadland'

R Ashwin-i 'ICC Player of the Month' award angu



New Delhi, Metsüremi/March 09, 2021 (Agencies): India aser England na tsüngda tawa tembangba Test series asayamung nung India nung spinner takotet Ravichandran Ashwin-i alakteta junga shilem agia asayaba atema pa nem 'ICC Player of the Month' (February) award agütsüogo.

Iba Test series asaya pezü nung off-spinner Ashwin-i wicket 32 tashi agi aser run 189 tashi yanglutet, koba team ana nungi run timtiba yanglur batsman rongnung Ashwin asayar pungobuba alitsü.

Taoba ita, iba Test series asaya pezü nungi asembo asaya liasü aser iba test asayamung nung Ashwin-i külem team pur atema bendanga asayaba sülen, February 2021 atema pa nem ICC Player of the Month

naroküm agütsü.

Ashwin, shibai taoba ita Test wicket 400 agia liasü, pai iba asayamung nung Player of the Series-a nguogo.

"Iba ama tongtibang series ka nung Ashwin-i junga shilem agia wicket aika agiba yong England madak iba series akoktsü atema India team kanga nungitogo. Iba den külemi, tanabuba test asaya nung England team-i asaya akoktsü ama imlaa alidang, pai century yanglutetba ya team asoshi kanga tongtibang liasü. Pai century' yangluba ajanga India-i England team pur maongka tajung tuluka nokdangadok," ta Ashwin asaya indang jembiba mapang, taoba West Indies cricket asayar Ian Bishop-i ashi.

ICC Voting Academy tenüng

nungi Ian-i shilem agia liasü.

Team ana nungi wicket timtiba agir rongnung Ashwin alitsü. Iba series nung pai wicket 32 tashi agiogo. Kasa mapang, asayamung nung mezüing shilem agir Axar Patel, shibai tanabuba test asaya liasü, pai wicket pungongo pezüben tashi agiba densema wicket 27 out sütsü.

Ajisüaka, Ahmedabad nung Test asaya pezübuba nung Ashwin-i wicket pungo agiba ajanga India team-i iba asaya akokba den külemi series takok angu.

India-i iba series 3-1 agi England akok aser June ita New Zealand den World Test Championship final asayatsü atema qualify süogo.

"Asayar ajak (India team) atema iba series takok anguba ya kanga tongtibang. Parnok rongnung asayar karbo Cricket World Cup asayamung ka nung danga shilem agidanga mali. Asayar timbaka atema iba asayamung ya Cricket World Cup ama alitsü," ta WTC final atema India qualify asüba sülen Ashwin-i ashi.

Maneni, Tetsür Cricket category nung England tsür Tammy Beaumont-i 'Player of the Month' takok angu. New Zealand tour nung asayar ajak rongnung Tammy-i shilem tajung agiba asadangtetba sülen la nem iba award agütsü.

WTT StarContenderDoha: Sharath-iFranziska koka last-16 tongogo

Nagpur, Metsüremi/March 09, 2021 (Agencies): Mongolbarnü, World Table Tennis (WTT) Star Contender Doha asayamung nung India nung table tennis asayar takoktet Achanta Sharath Kamal-i tebur kija asaya round tanabuba koka pre-quarterfinals tongtetogo.

Tebur kija round tanabuba asaya nung World no. 32 Sharath aser Germany nung World No.16 Patrick Franziska na game pungo tashi toktepa liasü. Sharath-i Patrick madak 12-10, 3-11, 11-7, 7-11, 11-9 agi iba asaya

koktet.

Mezüing game Sharath aser Patrick na point kasa shi makümdang, Sharath point 1-0 agi tejakdang ser asaya tenzük. Game tasembuba aser pezübuba nunga asaya anaprongla kanga toktepa asaya, koba ajanga decider asayatsüsa aküm.

Game pungobuba nung, tukuben tashi senior national champion Sharath-i Patrick amokbanga asayatsü maongka ngua 11-9 agi German nungba tsükdaktsü.

Bodhbarnü, Last-16 stage nung, Sharath-i Egypt nung

Ahmed Saleh mesüra Germany nung Dimitrij Ovtcharov den asayatsü.

Kasa asayamung tebur-tetsür kija round tanabuba asaya nung, India nung Gnanasekaran Sathiyana aser Manika Batra nati pei tata asaya mekokteti iba asayamung nungi tsükogo.

World No. 63 Manika-i 7-11, 6-11, 7-11 agi Japan tsür Mima Ito, shiba world no. 3 nung lir, la makok. Ano külen, Japan nung world no. 5 Tomokazu Harimoto-i 4-11, 5-11, 8-11 agi Sathiyana tsükdaktsü.

ODI Series nung Kane Williamson masayatsü

Wellington, Metsüremi/March 09, 2021 (Agencies): New Zealand captain Kane Williamson tekatsü yirur aliba ajanga Bangladesh aser New Zealand tsüngda aruya aliba ODI series nung pai shilem magitetsü, ta Mongolbarnü Black Caps sangdong ka ajanga metetdaksü.

Team indang medical manager Dayle Shackel-i ashiba agi, Williamson abilen tekatsü nung timtem ka lir aser ibaji ajanga ita ishika pa kangshia arudar. Iba timtem liaka taoba nung Williamson-i asayatsü

merangogo aser tang Bangladesh den ODI series asem, koba March 20, 2021 nungi tenzüksü, iba asayamung nung pa masayatetsü.

"Iba timtem junga anepalutsü aser pa temang tajungba akümtsü atema pa (Kane) anisüngzüksü nüngdaker," ta Shackel-i shisem.

Coach, Gary Stead-i, June ita India den ICC World Test Championship final masayadang New Zealander team-i Williamson yirur aliba nungi taneptsü ngudaktsüner, ta ashi.

"Iba asaya nung külem team pur den asayatsü atema Kane yakta taneptsü ngudaktsüner," ta Stead-i ashi.

"Aruya aliba Bangladesh series nung team den Kane masayatetba ya onok atema tesasatsüka, saka pa iba asayamung nungi tukadokba ajanga ODI squad sangdongba mapang asayar ka pa melen shilem agitsü asoshi maongka tajung angutsü," ta pai ashi.

Bangladesh den aruya aliba ODI series atema Brehostibarnü New Zealand pur squad sangdongtsü.

Artistic All-Around World Cup athir

New Delhi, Metsüremi/March 09, 2021 (Agencies): Alima ajunga asüngba COVID-19 wara tenokdangba dak sendakba nung mepetmesü jenti ajuruba ajanga Tokyo nung ayonga asayatsü renemba Artistic All-Around World Cup asayamung thitsür, ta Mongolbarnü International Gymnastics Federation (FIG)-i ashi.

Taküm tsüklawa Olympics atema Artistic All-Around World Cup (Gymnastics) ya renemshiba asayamung ka ama asayatsü renem.

Iba gymnastics asayamung, koba May 4, 2021 nungi asayatsü renem, iba ya taküm indang all-around series ama agitsü sentong liasü. Ajisüaka, Olympics renemshiba dak sendakba nung asayamung ana

tashi atiba yong iba series magitetsü akümer, ta sangdong ka ajanga FIG-i metetdaksü.

"Japan den külemi alima tesem balala nung nüburtem senzügenbongtsü asoshi tenokdangba aser Olympics Games tejakdang linük nung coronavirus wara prokba azüoktsü asoshi tekolakpurtemi mera balala agiba asadanga iba World Cup thitsütsü telemtetba agi," ta federation-i ashi.

Sangdong ka ajanga Tokyo 2020 achayangertemi, May 04, 2021 nü national gymnastics asayamung den 'operational test event' ka ayongzüksü aser renemba ama May 8, 2021 nü rhythmic gymnastics test event ayongtsü, ta metetdaksü.

Serie A: Inter Milan-i Atalanta kokogo

San Siro, Metsüremi/March 09, 2021 (Agencies): Hombarnü, Serie A asayamung nung Inter Milan-i goal 1-0 agi Atalanta madak takok ngua point trok agi table nung temaba jenjang tongtetogo.

Inter atema Milan Skriniar-i iba goal idakja liasü. Iba asaya densema Inter-i league asaya tenet akoker alitsü aser 2010 nungi par teloki tan season indang title mezüing akoktsü temulungtetba nung asayadar.

Antonio Conte'er telok Inter ya tanabuba jenjang nung alir AC Milan tejakdang kumogo. Deobarnü AC Milan-i goal 2-0 agi Hellas Verona kokogo. Kasa mapang, Juventus-i Lazio madak goal 3-1 agi takok nguogo aser point 10 agi Inter Milan memenep lir.

San Siro Stadium nung Inter aser Atalanta na asayaba mapang, mezüing half tashi telok kati danga goal meinoktsüteti tembang. Ajisüaka, tanabuba half nung Atalanta-i corner ka

meinoktsütetba sülen, minute 54buba nung Skriniar-i telok atema goal ka idaktsü.

Atalanta pur table nung jenjang pungobuba tongteta lir, koba Champions League berth nung parnok madener aser tan season asaya 12 anünga lia point 13 agi temaba jenjang metongteti lir.

"Onoki junga asayatsü merang aser corner ka meinoktsütetba ajanga tebilemba metongtet," ta Atalanta coach Gian Piero Gasperini-i ashi.

Atlanta puri point kati jenjang pezübuba nung alir Roma memenep lir.

"Inter aser Juventus na den asayadang langka kati onok mabensai asayar, saka onoki parnok den meneptepa asayatsü jenjang kati arudar," ta Piero-i ashi.

Inter Milan nung Romelu Lukaku aser Lautaro Martinez nati goal timba idakja lir, kong Italian top-flight nung tena sentepa goal 63 tashi idaktsüogo.

US tatong tir Harris kinungbu... (Tapak 8 nungi...)

Emhoff ya 2014 küm Harris den kibong akum aser Harris ya Tir Joe Biden den shimtetba sülen pai Los Angeles nung aliba DLA Piper indang law firm office yutsü. Ibai entertainment aser intellectual property law nungi wadang melenba lir, kong pai taoba küm sen million \$3 aazüka liasü, ta osang ajanga ashir.

Pa kinungtsü mapa tasenba nung yaritetba atema pela bilemer, ta Emhoff-i ashi.

"Asenoki sorkar nung tashi tait tetsür talila nüngdaker, aser asenoki business nung tashi tait

tetsür nüngdaker," ta pai ashi.

Washington nung museum aser library tem semdangba kisüing masü saka administration nung takotet nisungtem nungi ken o angazüksü atema teti tembir, ta Emhoff-i ashi. Pai virtual classroom nunga tayongzükba balala ajangshir, ta ashi.

Tesayur mapa ya kanga tasak ta ni angazükogo. Nü tashi ajunga agi mapa inyaktsü ya temela masü, talisa COVID mapang Zoom ajanga class agitsü ya kanga tasak lir, ta Emhoff-i ashi.

BILEMDANGANG

"Pei mapang tangazüksü timji angazükadoktsüla."